

Thursday, March 12, 2026

Time - 2:30pm - 2:35pm

**AKASHVANI AIZAWL
REGIONAL NEWS UNIT**

**REGIONAL NEWS BULLETIN
(MIDDAY)**



SESSION

Vawiin khan Assembly Budget session ni 15-na chhonzawm a ni a, Minister pahnih Pu B. Lalchhanzova leh Pu Vanlalhlana te hna chanpuala demand sawihoa pass tum ani ang.

Vawiina Assembly thutkhawmah hian thutkhawm atanga darkar khat chu zawhna leh chhanna atan hun hman ani dawn a, hemi zawh hian Minister Pu B. Lalchhanzova department enkawl 3 - Land Revenue & Settlement, Food, Civil Supplies & Consumer Affairs leh Information, Public Relations, Printing & Stationery tana sum ruahman cheng vbch 365, nuai 10 leh sing 7 sang 2 bakah Minister Pu Vanlalhlana department enkawl 3 - Parliamentary Affairs, Transport Department leh Public Works Department-a sum ruahman cheng vbch 446 nuai 45 sing 1 sang 4 te chu sawiho bakah pass tum ani dawn a ni.




UD& PA

Urban Development & Poverty Alleviation Department changtu Minister Pu K.Sapdanga'n karleh Thawhlelni, March ni 17 atangin Treasury Square leh Bazar Bungkawn inkar kawngpui chu feet 50 vela zauin laih tlang phei tur a nih thu a sawi.

Vawiin Assembly Budget Session zawhna leh chhanna hunah he thu hi sawiin, UD&PA Minister chuan Chief Minister kaihhruaina hnuaiah AR chhuahsan ram humhalh leh tangkai taka hman dan tur ngaihtuhtu Advisory committee din a nih thu a sawi a, chutah chuan party hrang hrang leh NGO aiawh, social actitives aiawh leh kohhran aiawhte pawh an tel a ti a. AR chhuahsan ram kut an thlak tura pawimawh ber leh mipui nghahhlelh ber chu kawngpui tih zauh nia a lan avangin karleh Thawhlelni, March ni 17 zing dar 7:30 atangin Treasury Square leh Bazar bungkawn inkar kawngpui awmsa chu inrual tlang phei patin, feet 50 vela zauin

laih tlang phei tur a ni dawn a, chu chuan lirthei tawt lutuk a chhawk zangkhai tura a rin thu a sawi a ni.

Minister chuan AR hmun hluiah hian hmanlai hmun ngaihhlut heritage value nei chi hrang hrang a awm a, Quarter Guard leh Loch house tih loh heritage value tak tak nei te lo chu thiah tura ruahman a ni a ti a. Mandir pawh suan chhuah a ni dawn tih sawiin, hemi hmunah hian vantlang mipuite tan public park siam a ni dawn a, Lammual grass pah pawh artificial grass tha ber chi in thlak tum a ni a. AR cinema hall hmunah chhawng li vel a sangin car sang tel lenna parking lot siam tum a ni a, chumi chungah chuan mi sang 2 vel lenna hall bakah mi 500 vel lenna hall engemawzat sak tum a ni a, hall pui ber chu Vanapa hall hming put tir tum a nih thu sawiin, Vanapa Hall awmsa chu hmanna tangkai dang zawn a ni dawn tih house a hrilh a, AR hmun hlui chu vantlang hmun pawimawh a nih dawn avangin venhimna tha tak a mamawh dawn avangin tlang bawk pakhat chu Police duty na hmun atan siam a ni dawn a, a hmun zau zawk luahtu tur chu hmun hring nuam tak (green area) siamin, Lammual thlang lamah ngaw nuam tak karah taksa sawizawi theihna kawng siam a nih tur thu House a hrilh a ni.



CHAPCHAR KUT

Mizote Kut pui ber leh ngaihhlut ber Chapchar Kut lawmna pui ber chu naktuk khian Aizawl Lammual ah nghah a ni dawn a,

Tun kar chhung zawng hian Chapchar Kut lawmna pual hian thil hrang hrang tih chhoh a ni a, Handloom & Handicrafts Exhibition chu Assam Rifles ram chhuahsan, Vanapa Hall chhakah nghah a ni a, Vanapa Hall-ah hian Art & Photo Exhibition buatsaih a ni a, Aijal Club City Park-ah Flower Show neih a ni bawk a ni.

Vawiin hian chapchar kut lawmna inbuatsaihna kal zelah I&PR Department te chuan Lianchiarin run ah mipui te tan a thlawna mizo film en theihna hun an buatsaih bawk.

Hetihlai hian Assam Rifles ram chhuahsan a Quarter Guard- ram ro hlu zinga ngaih ah, eitur zawrhna hmun atan hman a ni chu an ngaihkawh thu leh an phalloh thu New Delhi Wewa Bhavan atanga an dawn avangin Aizawl DC chuan chhuahsan tura a hriattir anga helai hmuna inpho te chu chhuahtir nghal an ni.

Chapchar Kut Lammual a hman turah hian thupui atan ‘zonun ze mawi- inremna ‘ hman a ni ang a , Kut Pa chu Chief Minister Pu Lalduhawma a ni dawn a, Kut thlengtu atan Pu Lalsawivunga Minister Art & Culture Dept. ani dawn a ni.

Chapchar kut 2026 lawmna ah hian, Hlado chham, Cheraw Kanpui, pawnto, Lengkhawm zai, Parlam, Pipu Zai, Lemchan , thla koh, mizawn inchuh, mal zai, pipu zai, zavai chai-Lera zai, khuallam te leh Mizo hnam thuam leh Mizo infiamna te entir na neih a ni ang a, Hei bakah hian hnam lam chi hrang hrang -singhi chham (sikkim), wangala (meghalaya) , hrangkol te neih a ni ang.UD&PA buatsaih faina lawman sem leh Cm Special Package lawmman semna neih ani bawk ang.

(Hruaia Aizawl PTC)

